

Ngaeux Diegcoj

Ngaeux, dwg gij doxgaiq gwnz daiz gwnhaeux ranghdieg Gyanghnanz miz dah miz daemz lai haenx ciengz miz, dwg gaiqgwn gyoengqvunz ngoenz-naengz ceiq yawj mbouj hwnj da hoeng youh mbouj ndaej mbouj miz he. De seng youq geh raemx, maj youq geh namh, ndawde ndumjhamz gyaundeidei caeuq cinghseuq. Cingq lumj gij vunz caeuq saeh laj bit Vangh Cwnghgiz sienseng simsoh youh laeggyae haenx, cungj ndaej mbouj rox mbouj nyinh rad deng sim vunz.

Seizhah aeng, mbaw ngaeux ndaw daemz mbaw ciep mbaw, beiq daengx daemz rim liux, baijok fuk gingjsiengq heuswd mwnhoengh. Gij mbaw ngaeux miz hung miz iq, miz mbaw mbe caez, miz mbaw miz di gienj suk, lumjbaenz daswyenz boux canghdajveh hungmbwk neix seizbienh roengz bit veh veh, youq gwnz raemx veh ok fuk doz hoenghhwd youh gyaundeidei ndeu nei. Hoeng youq baihlaj heuswd mwnhoengh neix, couh dwg gij ngaeux ndoj youq ndaw naezboengz, caegcaeg sengmaj, rom rengz maj oem, caj seizcou aen geiqciet fungsou neix daeuj ra de.

Vat ngaeux, dwg hangh hong gisuz ndeu, hix dwg hangh hong naek ndeu. Seiziq, daxboh daenj geu vaq fuengzraemx, byaij roengz daemz bae, dawz fag hongdawz vat ngaeux gagguh haenx youq ndaw naezboengz siujsim sisi bumhra, moix vat ok diuz

ngaeux, cungj lumj vat ndaej gaiq dijbauj ndeu. Gij ngaeux hausak, daiq miz gij heiqsik moq namhnaez, dwg gaiq doxgaiq ceiq caen mbwn namh soengq hawj dou.

Ngaeux, ndaej ronq baenz gaiq rob le dwk diuzliuh gyaux baenz byaekliengz, ndaej ronq baenz gaiq cau, lij ndaej aeuq dang, moix yiengh guhfap cungj ndaej baijok gij feihdauh daegbied de. Hoeng youq ndaw sim gou, gij ceiq ndei de, mbouj gvaq dwg duix mwnhngaeux genjgenj danhdanh he. Dawz ngaeux moq swiq seuq, muh baenz ieng, caiq aeu samuengx daih hawj raemx ieng caem daej, doeklaeng ndaej gij mwnhngaeux saeqnaeh hau lumj nae haenx. Mwh yaek gwn, cij aeu aenq raemxgoenj cung roengzbae, menhmenh ndau, duix mwnhngaeux ndongqngauez gyaqciq, heiqhom caengq ndaeng ndeu couh baij youq laj da.

Gwn mwnhngaeux ceiq ndei youq haetromh gwn. Mwh geu ndit daih'it ndonj gvaq mok mbang, ciuq youq gwnz daiz, duix mwnhngaeux ndatfoedfoed ndeu, dapboiq aen gyaeq habbau ngamq cien baenz, couh dwg gij haidaeuz ceiq raeuj ceiq hom ngoenzde. Gij mwnhngaeux haenx, raeuzrad mbouj nywnx, van unq mbouj get, haeuj bak cix yungz, couh lumj yaepyet ndaej yoek hawj gij bak ngah gwn ninzndaek daengx hwnz haenx ndiu dauq, hawj vunz cingsaenz gvaekgvaek.



Duix mwnhngaeux neix, dwg faenh fuk iq ndaw ndwenngoenz ndeu, de mboujdanh dwg gaiq gwn he, engq dwg cungj geiqdak cingzgamj ndeu, cungj ndiep diegcoj ndeu, cungj ngeixdauq seiz lwngyez ndeu. It baez ndaej cimz gij feihdauh sug neix, sim gou mbouj youz gag mbin dauq diegcoj raeujrub caeuq ce rim ngeixdauq haenx. Gizhaenx miz coenz daengq bohme, miz angq riu seiz lwngyez, miz ndwenngoenz gig genjdanh hoeng gyaundeidei. It baez rumzcou hwnj, gou couh roxnyinh youh daengz seizciet vat ngaeux lo, faenh raeuj ndaw ranz hawj gou haenx caiq youq ndaw sim gou baenqvaenz.

*(Cau Yencwz raiz
Veiz Yen' yangz hoiz)*

Mwngz Yawjraen Seizcin Lwi?

☐ Se Beiyungz

Mwngz yawjraen seizcin lwi?
De youq ndaw fwnmoenq ninz gyaenfefe.
Mwh fwncin cup daihdeih,
Seizcin couh ndiu lo.

Mwngz yawjraen seizcin lwi?
De youq gwnz nyod'oiq ndwjda moenghmangh,
Iet mbat nonx ndeu, aj mbat rumz ndeu,
Couh hwnq mbonq lo.

Mwngz yawjraen seizcin lwi?
De youq ndaw mbawliux yietbag dinghsoeb.
Mwh rumz iq rubluh nyeliux,
De couh caeuq rumz itheij fouxyegyeg.

Mwngz yawjraen seizcin lwi?
Gou yawjraen seizcin lo,
Seizcin couh youq henz ndang dou.



Saek Seizcin

Seizcin dwg lai saek lai yiengh, daengngoenz hoengzfwgfwg, mbwn seuq-liklik, mbawfaex loegyeyeu, vacin henj-rwkrwk..... Nanzgvaiq boux canghsei maij raiz seizcin, boux canghveh maij veh seizcin, aenvih seizcin gyonj gij gyaeu youq itheij, gyonj gij saek youq itheij. Gijneix mbouj ndaej mbouj hawj vunz ngeixngvanh daengz, gij lai saek lai yiengh neix vihmaz leh youq seizcin mbat dog daeuj daengz gwnzbiengz.

Seizcin fwn doek moenqfifi, hawj namh nyinh caez, rwed sojmiz doengh-yiengh liux, youq mwh gyoengqvunz mbouj rox mbouj nyinh, de caegcaeg lae baenz diuz dah iq ndeu, rom baenz daemz raemx laeg ndeu. A! Laxlawz dwg seizcin doek fwn

cix hawj ndaw daemz bienqbaenz loegyeyeu.

Rumz caeuq fwn cungj dwg guhdoihaeuj daengz. Haicin rumz miz di nit, boqsingj sojmiz doenghyiengh, byaifaex loeg lo, gwnzbiengz loeg lo, gwnz binghdaiz aen laeuz sangngaungau hix loeg lo. Sungcauz Vangz Anhsiz miz sei naeuz: "Rumzcin youh loeg hamq Gyanghnanz." Naeuz ndaej gig ndei ha! Hoeng cij dwg "loeg" ma?

Youq ndaw rumzcin ci daengz, va hai rim bo rim baq, duj ndeu song duj, caz ndeu song caz.....Lienz baenz beng, lienz baenz haij. Gyoengqvunz yawj saeklamz saeknding saekhenjGij saek lai saek daih heiqseiq hungmbwk neix, ndaw sim mbouj miz nyapnyuk lo, mbouj miz doeknaiq lo. Gyo' mbaiq gij saek seizcin, daiq hawj vunz gij ligliengh doxhwnj caeuq saenqsim.

Hoeng, danghnaeuz mwngz gungj-ndang bae saeqsim yawjngonz, mwngz couh fatyienh gij saek ndeiyawj de, lijimiz di reuqhenj, de dwg gij rizhaenz mwh ndwenlab ce roengzdaeuj, lauhei qmwngz rox dangheiq: "Caen dwg ndei mbouj liux caez ha!" Yawj bae gij nya reuqhenj de, bouxlawz rox, yienzlaiz gij nya baihrog reuqhenj haenx baihndaw de dwg loeg lo! Gijde hix dwg hawj seizcin dem saek ne.

Gou dauqdae j rox daengz gij saek seizcin vihmaz baenzneix gyaundeidei, dwg dahsau seizcin dawz gaiq bitcaij gyang fwngz de veh okdaeuj, dwg gwnz ndang lwngyez daenj geu buh gyaundeidei, dwg vunzlai yawj mbouj raen gij go' nya menhmenh did loeg haenx.

Gij vunz caenhcingz bae yiengjsouh gij saek seizcin haenx, mwngz youh guh ndaej gijmaz hawj saek seizcin?

*(Cwnz Yungzsez raiz
Veiz Haijgen hoiz)*